

大清會典


百二十六





內閣文庫			
函	冊	號	類
二	一	八九	漢書
五	一	八九	

內閣文庫			
函	冊	號	類
二	一	八九	漢書
五	一	八九	

內閣文庫	
番號	漢 1899
冊數	141(126)
函號	295 1







大清會典卷之一百四十四

柔遠清吏司

理藩

淺草文庫

外藩四十九。雖各異其名。視內八旗無異也。蒙古諸部有喇嘛厄魯忒喀爾喀。視四十九旗又為外矣。喇嘛之人。率宗釋教。厄魯忒喀爾喀亦以時朝貢。奉職惟謹。

國家以羈縻之意。溥懷柔之仁。其所及者遠矣。司蓋專司其事焉。

喇嘛

順治九年題准。後黃寺。每歲正月初八日至十

五日集喇嘛班第誦經。凡需用物俱由該部取給。○十年給達賴喇嘛金

冊金印。○又給厄魯忒顧實汗金

冊金印。○十四年題准。每旗各選三人學習湯古忒字義。給教習人六品俸。○又題准。京師設四札薩克喇嘛。

盛京西勒圖庫倫歸化城等處。各設首領喇嘛。其下各設德木齊一名。○又題准。後黃寺。每年誦經喇嘛班第。定為四百名。○又題准。喇嘛班第等。為人所召誦經治病。必向首領言明。限定日

期。若私往及違限。或擅宿人家。或借端留婦女於廟者。照律治罪。除院冊有名喇嘛外。不許添設。外來私行喇嘛班第等。亦不得擅留。違者治罪。○十七年題准。歸化城喇嘛等。有事往厄魯忒喀爾喀處去者。俱具題而往。都統不時稽察。不許妄為。厄魯忒喀爾喀往來人。及喇嘛班第等。不許擅留。違者治罪。○十八年。給喀爾喀丹津喇嘛

勅印。○康熙元年題准。外藩蒙古察哈爾遊牧蒙古諸人。欲令家人為喇嘛班第。及留各處所來喇

會典卷一百四十四
喇嘛班第皆開寫數目送院注冊。違者治罪。凡隱
喇嘛班第不載入冊者。以隱丁論。○三年題准
盛京四塔各設首領喇嘛一員。格龍班第各十七
名。○五年題准。喇嘛等出使向達賴喇嘛處。擅
帶彼處喇嘛班第來者。從重治罪。○六年題准。
喇嘛格龍等。許服金黃鶯黃大紅等色。班第等
許服大紅色。此下人不許擅服。曾被
上賜者。各色俱准服。若違禁服用者。大喇嘛罰一九
牲畜。班第以下鞭一百。○十年題准。湯古忒處
喇嘛。非奉

旨不許輒來。○十一年題准。由內王等取充後黃寺
班第一百八名。有逃走死亡者。將墨爾根綽爾
濟額外冊內有名班第頂補。若無額外冊內有
名班第。仍行禮部於各主下取人補充。逃走自
歸者。革去班第。交還原主。○十三年。給喀爾喀
扎薩克阿海代青台吉

勅印。○十六年題准。扎薩克首領喇嘛。給與印信。其
餘喇嘛班第等。給與禁條度牒。

盛京西勒圖庫倫歸化城首領喇嘛。亦給印信。部
冊有名喇嘛班第。給與度牒。外藩四十九旗。每

旗各設首領喇嘛一員。給與度牒

朝貢

國初定。歸化城土默特二旗。每年四季貢馬一百匹。緞一百疋。○又定。給有信牌使人。邊外得乘驛馬宿處。准給食物。不給食物者。罰牛一頭。不給驛馬。罰牲畜三九。故意驚散馬群者。罰一九。無信牌冒索驛馬食物者。拿送院治罪。扎薩克貝勒貝子公等宿處。不給食物者。罰牛一頭。非扎薩克貝勒等。擅支食物者。罰馬一匹。○順治二年題准。歸化城土默特二旗。四季貢馬一百

六十三匹。免貢緞疋。○十一年題准。喀爾喀八扎薩克。每年進貢白駝各一匹。白馬各八匹。照例各賞給銀茶桶茶盆。蟒緞緞布等物。○十三年題准。厄魯忒達賴汗等使人還者。給驛馬二十五匹。馬車十二輛。其帶來馬駝。每宿處給與草料。至西寧止。○十四年題准。歸化城二旗。每年進石青二千斤。○十八年題准。厄魯忒來貢者。途中買來喀爾喀男婦子女。准其轉賣。令買主於戶部存案。○康熙七年題准。喀爾喀進貢之使與厄魯忒之使同來。令厄魯忒之使首坐。

喀爾喀等使接坐。其次令俄羅思之使坐。台吉等之使來。令各按旗坐。○八年題准。厄魯忒喀爾喀進貢之人。經由何旗斥堠。該旗斥堠章京撥什庫兵丁等。卽爲護送。轉交相接之旗。至張家口。俟院遣往接官員交訖。准回。違者治罪。若途中强行換買馬駝者。護送官兵拿送院。○十七年題准。外藩各旗庶人冒稱台吉進貢者。鞭一百。罰三九牲畜。驍騎校冒稱佐領進貢者。革職。罰三九。同來台吉知情冒賞者。革去台吉。罰五九。○二十年題准。厄魯忒喀爾喀來使。不令

同日行禮。○又題准。厄魯忒喀爾喀來使。遇

萬壽元旦冬至。令厄魯忒在右翼。喀爾喀在左翼。行禮。○又題准。凡冒取出邊票。往接厄魯忒喀爾喀等處人欺騙進

上之物。或貢物沿途貨買。及進館後進

上未畢。先自貨買。而擅爲通事者。係旗下人。枷號三個月。鞭一百。其家主係官。罰俸六個月。係庶人。鞭八十。佐領驍騎校。罰俸三個月。撥什庫。鞭五十。係民。枷號三個月。責四十板。該管官。罰俸三個月。總甲。責二十板。護送官及看館官。失於緝

獲各罰俸三個月。撥什庫兵丁各鞭五十。進貢事畢後。本院派出官員筆帖式監視貿易。貪利洩漏內事者。照光棍例治罪。○二十一年題准。厄魯忒喀爾喀等人謝

恩。不得過二百人。若來者衆多。分爲數次。○二十二年題准。厄魯忒噶爾丹進貢使臣。有印憑者。許進內。其噶爾瑪等四台吉使人。無印憑亦准進內。皆不得過二百人。餘者令在張家口歸化城貿易

賞給

國初定。凡喀爾喀厄魯忒汗台吉喇嘛等卒。遣大臣侍衛及本院官員往祭。○又定。賞歸化城進貢官員裘帽帶靴弓箭鞍轡銀兩。○順治十年題准。喀爾喀投誠人。封親王郡王公者。賞裘帽帶靴盔甲弓箭鞍馬緞布皮張銀器有差。隨從大臣亦分別給賞有差。○十四年題准。後黃寺誦經喇嘛。每年賞銀一千兩。由戶部取給。○十八年題准。逃來喀爾喀人。遣還時。按時給與衣帽靴襪等物。冬時添給貉皮袖。無馬者給馬一匹。○康熙四年題准。喀爾喀投誠人。封貝勒

貝子及一二三四等台吉者。各賞裘帽帶靴。盛
甲弓箭鞍馬。緞布皮張銀器有差。隨從人員亦
分別給賞有差。○七年題准。投誠人。觀其較射
分爲四等。賞給人口衣帽帶靴。及房地器皿牛
馬鞍轡有差

大清會典卷之一百四十四

大清會典卷之一百四十五

理藩院四

理刑清吏司

遐陬之衆。不可盡以文法繩之。

國家之待外藩也。立制分條。期於寬簡。其要歸仁
厚。將使臻於咸善而已

刑例

國初定。邊內人在邊外犯罪。照內律。邊外人在邊
內犯罪。照外律。八旗遊牧蒙古蘇魯克人等。俱
照外律治罪。○又定。凡罰以九論者。馬二匹。犍
牛二頭。乳牛二頭。犏牛二頭。騾牛一頭。以五論

會典卷一百四十五
一
者。犍牛一頭。乳牛一頭。牯牛一頭。犛牛二頭。○
又定。凡王等審理已決之事。復行控告。覆審無
冤抑者。罰告人一。九。扎薩克貝勒貝子公等所
審者。罰告人一。五。官員所審者。罰告人馬一匹。
○又定。凡罪已審結。本人不告。旁人代訴。罰馬
一匹。給原審人。○又定。有罪應罰牲畜而言無
有者。三。九以上。擇令旗內大臣立誓。一。九以下。
擇令佐領內立誓。○又定。民家結姻。聘禮准給
馬五匹。牛五頭。羊五十隻。踰數多給者入官。聘
定後婿故。准取還聘禮。女故者取還聘禮之半。

聘定之女。婿憎嫌不娶者。不准取聘禮。○又定。
庶人在王前明出惡言者。罰給三。九。扎薩克貝
勒貝子公罰給二。九。台吉罰給一。九。在背後言
者。審實一例治罪。詬罵大臣者。罰給一。九。副都
統罰給七頭。叅領罰給五頭。佐領罰給三頭。○
又定。扎薩克王等所遣人。貝勒等擅責。罰三。九。
庶人擅責。罰一。九。○又定。外藩蒙古買人出邊
永行停止。○又定。歸化城二旗。不許賣漢男婦
子女與未降外國。○又定。外藩蒙古。以他日為
歲者。係王罰一。九。扎薩克貝勒貝子公等罰七

頭。台吉等罰五頭。庶人罰馬一匹。給出首人○
又定。不設十家長者。主罰馬十匹。扎薩克貝勒
貝子公罰馬七匹。台吉罰馬五匹。○順治四年
題准。科爾沁十旗。違禁遣人向黑龍江等處。買
貂皮者。係王罰九九。扎薩克貝勒等罰七九。台
吉罰五九。往貿易人。爲首者斬。餘各罰三九。攜
往之貲入官。迎往貿易者。概罰三九。貲亦入官
○八年題准。外藩蒙古人有訟。赴各管旗王貝
勒等處伸告。若審理不結。令會同會審旗分之
王貝勒等審。仍不結。王等遣送赴院。如未在王

等處伸告。越次赴院者。一概發回。○十四年題
准。休妻者。妻帶來之物。現在者。一概給還。○十
五年題准。外藩蒙古人身歿無子者。令其兄弟
承受家產。舊給該管主。今不准。○十八年題准。外藩蒙古

人身歿無嗣者。生前曾將族中兄弟之子。具保
向各扎薩克王貝勒貝子公等言明撫養者。准
其承受家產。若抱養棄子。他姓之子。家奴之子
者。不准承受家產。生前未立嗣者。家產令近族
承受。無族中兄弟之子。生前在王貝勒等處稟
明。將異姓之子撫養者。亦准承受家產。身歿後

現有同姓人而其妻撫養他姓者不准。如撫養妾生子爲子者。其生子之妾不得嫁賣。如嫁賣不准爲子。無近族亦無他姓養子。其家產給該管王貝勒貝子公台吉等。○康熙元年題准。擬定死罪監候秋後犯人。照刑部例會同九卿議奏。○九年題准。凡已結事件稱有冤枉者。仍赴本院告理。又稱冤枉。許赴通政司鼓廳告理。○十三年題准。庶人在非扎薩克貝勒貝子公台吉塔布囊等前。明出惡言者。照扎薩克例罰給牲畜。○又題准。喀爾喀厄魯忒湯古忒巴爾虎

等處。私遣人往貿易。遣人探親。出斥埃迎往貿易。招攬貿易者。係王罰馬一百匹。貝勒貝子公等罰馬七十匹。台吉等罰馬五十匹。都統副都統革職。罰五九。叅領佐領革職。罰三九。驍騎校革職。罰二九。撥什庫十家長鞭一百。罰一九。貲財入官。爲首貿易之人。絞。籍其家。餘各鞭一百。罰三九。貲財入官。如斥埃人不行緝獲。被人首發者。官員革職。籍其家。兵丁鞭一百。罰三九。半入官。半給出首人。令赴願往旗分。○又題准。非扎薩克貝勒貝子公台吉塔布囊等有罪。照扎

薩克貝勒等一例議處○十四年題准。凡審定死罪犯人。扎薩克王貝勒等在附管扎薩克王貝勒等處說明。審過處決。不與附管扎薩克王等說明。審過處決。以私殺論。會集所審死罪人。卽於會集處處決。○十五年題准。凡死罪不令王貝勒貝子公額駙立誓。於本旗內擇令台吉塔布囊立誓。若立誓准死罪人。以九九馬匹贖。○十八年題准。台吉等擅與喀爾喀厄魯忒人婚姻往來者。革去爵級。不准承襲。所屬人全給其近族兄弟。除妻子外。家產牲畜俱入官。所屬

人隨往者。各鞭一百。罰三九。將所屬人女遣令隨嫁。女父不向扎薩克王貝勒處說明者。鞭一百。所遣送嫁屬人不自說明者。亦鞭一百。失於覺察斥堠官員。革職籍其家。兵丁鞭一百。罰三九。若將所遣送嫁人誤以爲逃人解院者。扎薩克王等罰五九。○二十二年題准。凡外藩蒙古人。誘賣內地人及爲妻妾奴僕者。爲首人擬絞。解院送刑部監候。秋後處決。爲從人鞭一百。罰三九。止一人者以爲首論。誘賣蒙古人爲妻妾奴僕者。爲首人卽絞。餘照前例。串誘買賣者。鞭

一百罰三九。被誘人鞭一百○二十四年題准。喀爾喀進貢人違禁有罪者。大事照內例治罪。小事行文該扎薩克處。令送所罰牲畜。

人命

國初定。外藩蒙古王等。故殺仇殺死各屬下人。及家奴。罰馬四十匹。貝勒貝子公等。罰馬三十匹。台吉等。罰三九。給死者親屬。旗內聽所欲往。若無仇隙誤傷致死者。首明情由。將所罰入官。死者親屬不准開出○又定。射斫家奴。或割截耳鼻者。王等罰牲畜五九。扎薩克貝勒貝子公罰

四九。台吉等罰三九。庶人罰一九○又定。外藩蒙古鬪毆傷人致成殘疾者。罰牲畜三九。得愈者。罰一九。傷孕婦致胎墜者。罰一九。打損人牙齒者。罰一九。斷人髮及帽纓者。罰五頭。用拳及鞭桿打人者。罰五頭。互打者無罪○又定。燠野獸穴以致失火者。罰一九。給見証人。延燒致人死者。罰三九。給死者之家餘誤失火者。罰牲畜五頭。給見証人。延燒致人死者。罰一九。給死者之家。延燒死牲畜者。照數賠償○又定。射斫人牲畜致死者。如數賠償外。罰一九。係馬加倍償

與不致死。罰糝牛。○順治十五年題准。夫故殺妻者抵絞。○又題准。鬪毆傷重五十日內死者抵絞。○康熙五年題准。射斫家奴。割截耳鼻致死者。以故殺仇殺論。○六年題准。家奴殺主者凌遲。○十三年題准。官民人等失誤傷人致死。有人見証承認者。罰給三九。若無見証可疑者。擇令旗內人立誓。若立誓。罰給三九。不立誓。抵絞。○又題准。官民人等與妻鬪毆誤傷致妻死者。罰三九。給妻家。妻有過犯。不行首告。擅殺死者。罰三九入官。○又題准。蒙古王貝勒等故殺

仇殺謀殺他旗人者。除償人外。王罰馬一百匹。貝勒貝子公罰馬七十匹。台吉塔布囊罰馬五十匹。給死者妻子。係庶人抵斬。除妻子外。家產牲畜亦給死者妻子。○又題准。塔布囊等殺死屬下人及家奴者。照台吉例罰。係都統副都統罰三九。叅領佐領驍騎校罰二九。庶人罰一九。俱給死者妻子。併其兄弟。俱令出旗。誤傷致死者。向扎薩克處說明。若無仇隙。不准出旗。所罰入官。○又題准。官民人等挾仇放火致人死者。係官絞。庶人斬。致死牲畜者。係官革職。庶人鞭

一百。除妻子外。家產牲畜。悉給被害人之妻子。
○又題准。官員射斫家奴。割截耳鼻者。罰二九。
致死者。以故殺論。

賊盜

國初定。失去牲畜。過三日向附近扎薩克處稟明
緝獲。若不稟明緝獲。每頭匹罰羊一隻。亡失牲
畜。冒稱已有者。罰三九。錯認取者。罰一九。因無
失主隱匿者。罰一九。輒騎亡失牲畜者。罰一五。
○又定。亡失牲畜。路人擅自收留者。以盜論。○
又定。出首盜賊可疑者。令盜賊立誓。不令出首。

人立誓。○又定。窩隱盜賊者。王罰九九。扎薩克
貝勒貝子公罰七九。台吉罰五九。台吉爲盜者
罰七九。若事發不承認者。令其伯叔立誓。無伯
叔。令其伯叔之子立誓。○又定。夥隱盜賊不首
者。王罰三九。扎薩克貝勒貝子公罰二九。台吉
罰一九。○又定。凡駝馬牛羊一人盜者。不分主
僕。絞。二人盜。斬一人。三人盜。斬二人。衆人夥盜
者。爲首二人斬。餘俱爲從。鞭一百。罰三九。家奴
偷盜。鞭一百。追取所有。無可追者。於其主名下
加倍追取。籍沒爲首人妻子家產牲畜。併爲從

人所罰牲畜俱給失主○又定。凡偷盜駝馬牛羊情有可疑者。令立誓。若立誓免其罪。不立誓照前例治罪。其妻子家奴免籍沒。追取所有牲畜併向該管主罰一九牲畜。給與失主○又定。賊已發覺。王等不行拿解以致疎脫者。以窩盜論○又定。盜財物者。除照數賠償外。所盜財物。值犛牛以上。價罰三九。值羊價罰一九。以下罰犛牛一頭○又定。盜賊未至十歲者。不以盜論○康熙元年題准。台吉官員等。攜家擅出斥堠遊牧。及窩隱偷盜喀爾喀馬匹賊人。擅責喀爾

喀人劫奪馬匹什物者。革職。家產籍沒。從往人各鞭一百。斥堠官員革職。罰三九。兵丁鞭一百。都統等官不知情者免議。所沒家產及罰物。給喀爾喀失主。其妻子不准給。取贖價與之○二年題准。死犯逃脫者。收管官員罰三九。驍騎校革職。罰二九。撥什庫鞭一百。兵丁鞭八十。若脫逃不係死犯者。官員罰二九。驍騎校罰一九。撥什庫鞭八十。兵丁鞭五十。逃犯若被旁人捉獲。卽以所罰給捉獲人。如無捉獲人。給札薩克王貝勒等○四年題准。外藩蒙古各旗佐領下有

爲盜者。罰該佐領二九。驍騎校一九。撥什庫七頭。十家長鞭一百。罰一九。一佐領下有盜二次者。佐領革職。罰二九。驍騎校革職。罰一九。撥什庫鞭一百。罰一九。十家長鞭一百。家產籍沒。一叅領下有盜三次者。叅領罰三九。一旗下有盜三次者。管旗王貝勒貝子公等各罰五九。都統副都統各罰三九。所屬人偷盜者。該王貝勒貝子公台吉塔布囊各罰三九。庶人家奴偷盜者。罰其主一九。王以下。若能嚴查所屬。將爲盜人拿解者免罪。仍給所罰之半。若失於稽查。被他

旗人拿獲者。都統以下所罰併給之。王等所罰入官。八旗遊牧蒙古察哈爾人爲盜。被獲二次者。該管官罰三九。副管官員佐領各罰二九。驍騎校撥什庫十家長等。照外藩蒙古治罪。蘇魯克人爲盜。其頭目亦照佐領治罪。盜賊或被失主捉獲。或被旁人捉獲。卽送該扎薩克王貝勒貝子公官員處。王等卽撥人併失主捉獲人解院。○五年題准。衆人爲夥。盜劫喀爾喀馬匹等物者。除照例治罪如數賠還外。共罰給一九。所餘家產妻子入官。若喀爾喀人將失物多捏謊

報令其爲首人立誓。若立誓。照數賠給。不立誓。止照現在之數賠給。若喀爾喀人爲夥盜劫內地馬匹等物者。爲首二人斬。一人斬一人。餘各鞭一百。罰該管主一九。移文令其送至。○六年題准。捉獲賊盜。不解院私議完結者。以盜坐罪。所罰物給出首人。管旗王以下至十家長。一併從重治罪。○十三年題准。凡明行搶劫者。係王罰馬一百匹。貝勒貝子公罰馬七十匹。台吉塔布囊罰馬五十匹。行劫殺人者。罰馬外。頂替贖人。以兵器傷人。致成殘疾者。罰馬外。仍以身價之半給。二九。官民人行劫殺人傷人者。不分首從。俱斬。妻子家產籍沒。不曾殺人傷人者。爲首二人絞。妻子家產籍沒。爲從者各鞭一百。罰三九。若止一人。鞭一百。籍沒家產。免其妻子。二三人者。以一人爲首。餘爲從。所罰沒俱給失主。○又題准。台吉等親身爲盜者。革去爵級。追取所屬人。免沒家產。○又題准。發掘王貝勒貝子公等墓者。爲首一人斬。妻子家產籍沒。餘各鞭一百。罰三九。發台吉塔布囊墓者。爲首一人絞。餘各鞭一百。罰二九。發官員墓者。爲首一人鞭一

百。罰三九。餘各鞭一百。罰一九。發度人墓者。爲首一人鞭一百。罰一九。餘各鞭八十。罰一九。罰沒家產牲畜。俱給墓主。○又題准。劫奪死罪犯人者。不分首從。俱斬。劫奪罪不至死犯人者。爲首人罰三九。餘各罰一九。○十六年題准。在邊界禁地偷竊劫奪者。被獲管旗王貝勒等以下。併該管主嚴行治罪。若不獲。治所入汛地。該管旗王貝勒等罪。兼令賠償竊奪之物。○十七年題准。傍人捉獲盜馬賊者。所籍沒家產牲畜。以二分給之。一分給失主。○又題准。外藩蒙古王

公主郡主等家人旗人偷向禁地採參者。爲首人斬。妻子家產牲畜。併所獲俱入官。爲從者鞭一百。家產牲畜。併所獲入官。免其妻子籍沒。公主郡主王以下。台吉塔布囊以上。遣家奴往者。各罰九九。都統以下。驍騎校以上。遣家奴往者。俱革職。撥什庫十家長。另戶之主。遣家奴往者。鞭一百。革去撥什庫十家長。各罰一九。所遣家奴本身及妻子家產。併牲畜所獲。俱入官。遣另戶人往者。管旗王以下。十家長以上。俱照遣家奴例治罪。另戶人及家奴偷採該管人。併各主

不知者俱鞭一百。罰三九。偷採參。傍人首發者。其參入官。交戶部。折半價給出首人。私買賣者。係蒙古鞭一百。罰一九。內地人交刑部。○十九年題准。邊禁等地方劫盜者。巡察官兵緝拿時。如抗拒。卽斬。不會抗拒被獲者。果係賊盜。俱斬。妻子家產牲畜籍沒。給與失主。不係盜賊。因其壞邊。爲首一人絞。除妻子外。家產牲畜籍沒。餘各鞭一百。罰三九。內地人出禁地劫盜者。官兵拿獲。照內律治罪。如內外官兵失於覺察。或失主。或傍人捉獲者。內地官革職。鞭一百折贖。外

地官革職。罰三九。內外兵丁。各鞭一百。盜賊之主。知而不舉。被傍人出首者。以窩盜治罪。出首人令赴願往旗分。若出首情虛。係官革職。罰三九。度人鞭一百。罰一九。○二十二年題准。外藩蒙古人入內地爲盜者。事發。量賠所盜物。其妻子家產牲畜籍沒。及所罰。一併入官。

軍法

國初定。派令出兵不去者。王等罰馬一百匹。扎薩克貝勒貝子公罰馬七十匹。台吉罰馬五十匹。率全旗俱不在者。軍法按治。期約處。一日不至

者。王罰馬十匹。扎薩克貝勒貝子公罰馬七匹。台吉罰馬五匹。遲誤幾日者。按日罰取○又定。出征。將禁馬騎瘦者。王罰馬三十匹。扎薩克貝勒貝子公罰馬二十匹。台吉罰馬十匹○又定。出征圍獵各處不俟衆先回者。王罰馬十匹。扎薩克貝勒貝子公罰馬七匹。台吉罰馬五匹。隨從人罰取所騎馬○又定。越境遊牧者。王罰馬十匹。扎薩克貝勒貝子公罰馬七匹。台吉罰馬五匹。度人罰牛一頭○又定。遠越所分地界。另行遊牧者。王罰馬一百匹。扎薩克貝勒貝子公


罰馬七十匹。台吉罰馬五十匹。度人本身併家產。俱罰給見証人○又定。凡隣旗有兵侵而不全率所屬甲兵速集議征者。王罰馬一百匹。扎薩克貝勒貝子公罰馬七十匹。台吉罰馬五十匹○順治三年題准。得出征人遺失馬駝各物及逃人者。俱收養送還。隱匿不送者。以盜論○康熙五年題准。擅以甲冑弓矢兵器賣與喀爾喀厄魯忒等。及給親戚者。王等罰馬一百匹。貝勒貝子公罰馬七十匹。台吉塔布囊罰馬五十匹。若係度人。爲首者絞。家產牲畜籍沒。從者各

鞭一百。罰三九。半給出首人。半入官。出首其主者。許出戶。蒙古人來京。不向本院說明。私買兵器帶往者。王等罰三九。台吉塔布囊都統副都統叅領佐領護衛官買各罰一九。庶人鞭八十。○十三年題准。外藩王貝勒貝子公台吉塔布囊等。遇敵交鋒。他旗敗遁。一旗王貝勒等攻戰有裨於他旗者。將敗遁之旗一佐領人丁。給與攻戰之人。他旗俱戰。一旗敗遁者。革去爵級爲庶人。將人丁盡給攻戰王等。若一旗內一半攻戰。一半敗遁。將敗遁王貝勒貝子公台吉塔布

囊等。革去爵級爲庶人。人丁盡給本旗攻戰之人。如一旗內半旗無計前進。半旗攻戰敗遁。將敗遁王貝勒等。革去爵級爲庶人。人丁盡給本旗無罪王貝勒貝子公台吉塔布囊等。其攻戰王貝勒貝子公台吉塔布囊等。各給賞。若各旗未及準備。一旗王貝勒貝子公台吉塔布囊已得準備。攻戰視其功之大小。獲之多寡給賞。凡曠野攻戰。王貝勒貝子公大臣。不按隊伍。輕入敵陣。或見敵兵單少。不行問明。擅自奔馳者。將所乘之馬。并本次所獲人口入官。凡列陣攻戰

時。須從容縱馬。各照對敵前進。若不照對敵前進。尾附他隊。或離本伍入他伍。或他隊俱進。立視不前者。各按所犯治罪。行兵之際。有一二人離伍搶掠被害者。將妻子入官。該管官治罪。失火者斬。不許拆毀廟宇。不許妄殺平人。抗拒者擊。投順者撫。其俘獲之人。勿得剝取衣服。拆散夫婦。至不堪俘獲者。亦勿得傷害。剝取衣服。俘獲之人。勿令看守馬匹。凡出征王貝勒等。務平定地方。救濟生民。嚴禁官兵。不許搶掠。不許陷害良民。平定之日。定行陞賞。若縱兵搶掠。指良

民爲賊。妄行殺戮者。從重治罪。與敵人相敵。正混戰時。有將落馬之人救出。與馬騎者。係公以下。副都統以上。給馬十匹。叅領阿達哈哈番以下。給馬六匹。庶人給馬二匹。俱於落馬人名下追給。○十五年題准。派出從征官員規避不去者。革職。罰三九。交於該管王等。仍令披甲押赴軍前。○十九年題准。外藩蒙古四等台吉以上。遣往管兵。陣亡者。照都統例。給身價銀兩。陣亡中傷殘疾病故官兵。身價賞卹等銀。俱照內例給與。



大清會典卷之一百四十五

大清會典

卷一百四十五

